

2 Kórinti

Ísu wíyómpa'a iyówana Póro moórá-waai úmai afakaeté-aataiya'iyó miyáumai-aatai maisuwéna maanáái agaimái Kórinti-naoraa-waasi Ísuni aampa'ó kun-kwáásí tímakaiye. Póro Máséndóniyaa-marafa'a mérowana Táítási Kórinti-nao'a tuwéna Pórompa'a wéména Kórinti-waasi-taai kosimámuwana Póro iséna séna aúfáíma agaimái tímakaunda isasá isésa tuwímbai sáwí'o ombá tínaaemba uwásukaawasa tuwímbai ímba miyá ésa kentáfésa sésa ímba érai'a Ísuni aantá-waasin-iyé wésewe séna érai'a Ísuni aantá-waasin-iyé síwae séna maanáúfái agaimarówasa mátimakaawe.

¹ Kemá Póro maanáái agai-timúmpo ísáaro. Moóráwigon-awí'a Tímóti kentáásí waásigo kesé'a méraisa'a agaimaráúmpo ísáaro. Maníkó wení imáyáafinkemba kentáféna séna aantá-waasi éma Ísu Káráisitín-aai kosimátíma'mae núwo séna sí'mákaifo ísáaro. Kórinti-naopakewi Maníkón-aaisafe'a érai'emo sewí ísáaro. Ákáyaa-marafa'a Kórinti-naopakewiye fí'o-fí'on-daopakewiye méraawi Fasi'aénkóní waási ísáaro.

² Maníkó kentáásifowawe Fasi'aénkó Ísu Káráisitiye úwoi túwa'nai esarai aáno'o uwátinkaayantafe'a inái sune.

³ Kentáásí Fasi'aénkó Ísu Káráisitín-afowa Maníkón-áwí'a mósá maráúmne. Wemá kentáásifowama arumbó uwásínkáíwai

siráfænasa súwa'nai iwáín-áwíta mósá maráúmne.

⁴ Fí'o-fi'on-umbai-tantaa'a seyaafá'á kentááfá'ó timbá Maníkó siráfaiyaimba póna fí'o-fi'on-umbai-tantaa'o tuwímbaifa'o tinda Maníkómó siráfaiyaintenta úmai kesáá miwí kanaa'á arásáfaitinkanaumne.

⁵ Káráísitimba áí'o úni'a uwánkówasa Káráísitini waási-i'o úndarakemba sí'a inda-i'o uwásínkáamba miyáumai Maníkómó Káráísitimbo aráfaiyaintemba miyáumaisa óraata siráfaiyaiye.

⁶ Kembiwísé'a méta túwa'nai ówánanasa sáwí'o urómpinkemba Maníkó tí'maena kawepá'á métínkaraiye. Miyá ówándarakemba sí'o únita uwásínkónta Maníkó siráfaiyaiye. Keséta méraawanasasa sí'o únita uwásínkónta ímba ifátuwaundasa fasi'ámaisa méraumne. Miyáumai tí'a inda-i'o uwátinkaiyamba kesáámó uráundantembo miyá é'o ímbo ifátuwe'o fasi'ámaimo méraiyanbo éna Maníkó kenkwará'á tiráfaitinkainiye.

⁷ Sí'o úni'o uwásínkaraantenta tí'a inda-i'o uwátínkáamba miyáumai Maníkómó siráfaiyaintemba tiráfaitinkaiyamba séta mindásafe'a fasi'ámai

ménaawe óraaka séta timu'maréta méraumne.

⁸ Kesí waásisono. Ésiyaa-marafataamo maéwánda fí'o-fi'on-umbai-tantaa'a kentááfá'ó túmba mináái isáíwae séta simátimumpo isáaro. Minúmbái-tántáá'ó fí'oran-oraa'-umbai-tantaa'a úwata kentááfá'ó túmba póta puwónaumne séta súnareta

⁹ sínkamiyata púwónda-kanaan-iye séta súnareta ímba kentáási fasi'aéntámbán-ifo

Maníkóní fasi'aéntámbá kisausa wémaeta méraumne. Maníkó pukáampinkembo iyáfasintinkaiwaini fasi'aéntámbá kisausa wémaeta méraumne súndasafenasa minóráá'-úmbái-tántáá'á kentááfá'á tiyáíye.

¹⁰ Umbai-tántáápímbá puwónae ówándafinkemba Maníkó síyótaisa uwásinkowata súnaraundasa póna miyámó uráintemba íníye. Sáwísampinkemba síyótaisa úmaena iyíníye sэта méraumne.

¹¹ Kewará'á kentáásáfé'a Maníkómpá'á súwa'nai e'a inai seró. Sáwífa'nanka inai síyana Maníkó súwa'nai índa mindásafesa Maníkómpá'á súwi sénááwe.

Póro karo'-áái ímbo simátímakain-aai.

¹² Waási túranka'o méraundasafeta imáyáa úndasa sirumpinkén-ímáyáágó séna kawel'-úmaisa méraumne sisatá aamoisá wéune. Marapá'-ááígóní áwáuma ímba imáyáa éta Maníkó úwoisaamo súwa'nai intáféta imáyáa éta Maníkóní kisausa aantemba maéta ímba kae'-ááíwára'-wáásiyáán-úmaisa méraundantemba kentúranka'a érai'a miyá úmaisa méraumne.

¹³⁻¹⁴ Agaimái timúnda-aufaifimba ímba kaumbo-kael'-áái simátimumpo toráumaimo awané'o ísaraan-aai aantemba tafisímai sune. Kentáási áwáuma kárika'a suwánaafo suwánamai kawel'a íwae sé'a únda miyámó é'o é'a Fasi'aénkó Ísu kumíndara'a kentáfétaamo aamoimó ondantembá kentáásáfé'a aamoí ónááwe.

¹⁵⁻¹⁶ Kembiwí kentáásáfé'a aamoí uwásínkááwe-aai imáyáa uráundasafe'a sé'a kae-kánáá kentópa'a kómé'a Máséndóniyaa-marafa'a

kónae únda kentópa'a kuré'a tiyuwé'a wéme'a Máséndóniyaa-marafa'a kuré'a kouweré'a aneka'á kentópa'a tiyé'a tiyuwé'a Yúndiyaa-marafa'a ténaumne siyáumne. Kae-kánáámó kawe'ó uwátínkáana'a súwa'nai íya'a Yúndiyaa-marafa'a ténaumne-imayaamo uráundasafe'a mináái siyáumne.

¹⁷ Miyámó ónae uráunda ímba miyá uráundasafesa kempínkémbá tuwímbai kentáfesa sésa kae'-ááíwará'-wáásín-iye siyáafo kentópa'a kónaumne siyáunda marapá'-wáásímó ontembá ímba miyámó únda mimbórá-ímáyáá úmai mimbórá-áái afora'á simátímakaumne.

¹⁸ Maníkó érai'-aai aantembo siyáintemba simátímakaunda-aai ímba kae'-ímáyááfínkémbán-ifo mimbórá-ímáyáá úmai mimbórá-áái afora'á simátímakaumne.

¹⁹ Sáírásiye Tímótiye kewé kentópa'o maéwánda Maníkón-ááninko Ísu Káráísitin-aaisa simátímakaunda wemá moórá-aai afora'á séna moórá-aai aúpá'á tuwéna miyá ímbo iwái póna seyaafá'-áái afora'-aantemba siwáín-aai simátímakaumne.

²⁰ Maníkó seyaafá'-áái símai fasi'ámakaimba Ísu Káráísitintafena siyáimba póna paápé uráíye. Ísu Káráísiti miyá-séyááfá'-kísáúmó maiyáintafeta Maníkó siyáín-aaisafeta érai'-aaiye súnanasa Maníkón-áwí'a óraa'a wéraiye.

²¹ Maníkó Ísu Káráísitimba kentááwé kem-biwíyé kááísasinkaraisata fasi'ámaisa méraumne. Kentáá wemparí'a úmarena

²² kesí waásin-owe séna érai'a wení waásisa úne sendasáfénasa wení ámútankomba ai'marówana

kentáásirumpimba kumbérimba mindásafeta sêta to'mayaa uwásínkarainta miyá ínîyesa sùne. Miyámó uráintafe'a ímba kae'-ááíwárá'-wáásíyáámbá úne.

²³ Maníkó kesí kisaugomba awánaraiwain-aúranka'o simátimunda-aai érai'-aain-iyê. Kórinti-naopa'a kentópa'a kónae séwánda óraaka simátíménana tirunkó umbaí taifó sé'a ifátuwe'a ímba kuráumne.

²⁴ Maníkón-aaisafe'a érai'e fasi'ámai sé'a wempá'á timankúnkúmba uráamba póta kentópa'o kondasá Maníkón-aaisafe'a timankúnkúmba oró-ááísá ímba aneka'á sênaumpo tirunkó aamoí índasafeta kempímbá taankarotámai méta kisausa komaénaumne.

2

¹ Imáyáa é'a sé'a aneká kentópa'a wé'a sáwí'o ontáfé'a óraaka simátíménana tirunkó umbaí taifó sé'a káfé'a ímba kónaumne siyáumne.

² Kentirumbó umbaí tátínkáanasamo ésa ke-sirumbó kawé'ó uwásinkaiyawí ímba ménaawe.

³ Kentópa'a ímbo kuráundara'a sé'a aúfáífimba toráumai awáné'a sáwí'o ombá kawé'á uwátinkaiwae sé'a kentópa'o kondá ímba sirunkó umbaí táínîye sé'a mináúfái agai-timé'a kawé'-úmaimo méraantafena kesirunkó kawé'ó índawí mináúfái agai-timakaumne. Kesirunkómó kawé'ó ínanamo éna kentirunkówárá'á kawé'ó índá mindá érai'-aain-iyê.

⁴ Mináúfái agai-timéwánda sirunkó umbaí tówa'a kentáfé'a óraa'-imayaa é'a áfááraumai ifi'á tátinke'a tirunkó umbaí táíndasafe'a ímba

mináúfái agai-tímakaumpo Póro wenaruntá áfááraumai símakaiye síyantafe'a mináúfái agai-tímakaumne.

Sáwí'o uráin-kwaasisafe'a enáái taí'áiyē serómó siyáin-aai.

⁵ Kempínkembá moórá-waasigo sáwí'o uráintafena ímba kempín-aantembanifo kembiwífínkembá tuwímbaifimba umbai-tántáá'á wéraiye. Seyaafápímbá umbai-tántáá'á wéraiye-aai miyán-óráá'-áái ímba sénae sé'a tuwímbaifimba umbai-tántáá'á wéraiye-aai sune.

⁶ Tímakaunda-aufai toráumai awáné'a símai moórá-aaiya'-maré'a fasi'aén-áái minkwáásígómbá simánke'a wení ewaa'á ímba mé'a sáwí'o uráintafe'a mimbéyámbá amé'a ímba fí'om-beyamba áméro.

⁷ Káfé'a wentáfé sé'a enáái taí'áiyē sé'a ímba aneka'á imáyáa úmae iyé'a aráfáéro. Kemó ámé-sawi-meyamba waé'wae'a ínana séna ímba kanaa kawel'-ámpá'á kónaumne séna ifátúwáifainifo

⁸ wentáfé sé'a embá siruntá amúmpo kawel'-úmai méraao seró-áái óraaka sune.

⁹ Ááéma kentáfé sé'a simátimunda-aai isánaa Ína isánááo sé'a kentópa'a ímba wé'a mináúfáifímbá agai-tímake'a timu'makáumne.

¹⁰ Sáwí'o uráin-kwaasigontafe sé'a wenáái taí'áiyē sé'a ímbo aneka'ó imáyáamo ontembá kewará'á miyá úne. Sáwí'o uráintafe sé'a wenáái taí'áiyē sé'a ímba aneka'á imáyáa é'a Ísu Káráísitin-aúranka'a kentáfé'a imáyáa é'a miyá úne.

11 Waántáwankoni sáwí-kisauconi áwáuma awánéta kentáá íyáákaifo séta sáwí'o uráintafeta aneka'á ímba imáyáa úmae iyéta séta wenááima tai'áíye sune.

Tóroasifa'la ména Póro óraa'-imayaamo uráin-aai.

12 Ísu Káráisitin-aai ásé-aai kosimátimenae sé'a Tóroasi-naopa'la komaéwánda minááímó isáiyantafena Fasi'aénkómó to'mayaa úmba awáné'a ásé-aai simátimenae sé'o ówánda

13 kesí waásigon-awi'la Táitási kenti naaópakemba Tóroasi-naopa'la ímba téna kentáái tasimásímíntafe'la ayaafái uwááe'a ímba awáné'a óraa'-imayaa é'la sé'a tiyuwé'a kónaumne sé'a Máséndóniyaa-marafa'la tiyáumne.

Ísuni fasi'aéntámbá siyáántán-kwimái áfontaamo fáúnda-aai.

14 Maarán-ááísáféta Maníkómpá'la súwisa sune.

Ísu Káráisiti íyáákaraintafena Maníkó wentéta kááísasinkenasa óraaka sisatá siyáántán-kwimái áfonta fáúne. Maníkó si'marówata Káráisitin-aai seyaafá'-máráfá'á kosimátimunasasa ísááwana wenááigo asaa-wiyúnkáámbá úmaena seyaafá'-máráfá'á wété wéiye.

15 Maníkó séna Ísu Káráisiti kentáféna imáyáa éna kesí kisaumo máimba asaa-wiyún-kánámó agáéntemba wéiye simbá miyámó intembá Ísu Káráisitin-aai simátimunanasana Maníkó kentáásáféna séna Ísu Káráisitimo intembá asaa-wiyún-kánámó agáéntemba owé wéiye. Maníkón-arááímo wáéwi minkwíyúmbá ísááwasa

waántáwankon-arááímo wáéwi minkwíyúmbá ísáámbe wéowe.

¹⁶ Waántáwankon-arááímo wáéwi puwésa Maníkóní némpa'a maé'mae'o íyawí Ísu Káráísitin-aai simátimunda-aaisafesa ánkúkaamban-iyé sewasá Maníkón-arááímo wáéwi minááísáfésa sésa asaa-wiyúnkáámbá wéíye sésa maé'mae'a ónááwe. Maníkón-aai simátímén-aai óraa-kisaun-ifo waási aantemba ímba kanaa'á wémaewe.

¹⁷ Maníkó si'marówata Káráísitini kísau-waasi méta wenaúranka'a Maníkón-aai érai'-aai simátimeta ímba kae'-ááíwára'-wáásíyáántá únasasa méyámbaréwa'a óraa'-ontamba maénae sésamo ontembá tuwímbai Maníkón-aai simátíménasasa méyámbá simíwae sésamo ontembá kesáá ímba miyásá éta Káráísitini kísau-waasi

méta Maníkón-aai érai'-aaisa simátimune.

3

Aú-aai símaimo kááísamakain-aai.

¹ Minááímó simátimundasafeta ímba kentáá súwí'a maéta wéiyune. Tuwímbai aúfái agai-tímúwasa maimaésa mátímúwa'a toráumai awáné'a kawé'an-owe siyááfo kesáá ímba miyá éta kentáásí kísaura'-aufai agai-tíménata toráumai awáné'a aamoí uwásinkaiwae-ita ímba éta ímba kentáásí kísaura'-aufai agáéro sumpo Maníkó si'maráísata wení kísausa wémaumne.

²⁻³ Tuwímbaimo fí'owiti kísaugoni aúfái awánésamo aamoimó uwátínkáántemba tuwímbai-waasi kembiwí tuwánésa sésa érai'a Ísu Káráísiti Póroe'a kísau máén-kwaasiye wenté'a ti'marówasa wenáái tasimátímúwasa

isésa érai'e suwaná Káráisiti wení waási-
i'a uwátinkowana Maníkó fasi'aénkwáráwíní
ámútanko miwítirumpimba méraisasa
méraawe wésewe. Mindásafe'a kembiwí
Káráisiti agaiyáin-aufaiyaamba owe. Ísu
Káráisitini kísaugoni aúfái ímba óntanka'o
agaiyáin-aufaiyaan-ifo kempá'a wérain-kisau
tuwánaantafeta aamoisá uwátinkaumne.

⁴ Ísu Káráisiti kentáá fasi'aémbá símísata
Maníkón-aúranka'a fasi'ámai méta minááísá
súne.

⁵ Kentááfimbá fasi'aémbá ímba wéraisata
minkísáúsá wémaumpo Maníkóní fasi'aéntántá
minkísáúsá wémaumne.

⁶ Maníkó aú-aaí símaimo kááísamakain-aaí
kosimátimewananasá wenaúranka'a arupise
uwátinkainasa méraiyantafena fasi'aéntá
símakaiye. Mináú-áái símaimo kááísamakain-
aaí maarán-iyé.

Ímba Maníkó Mósesembo simámakain-
amaamban-ifo Maníkóní ámútanko ken-
táásirumpimba méraisata wemó siyáintenta
únda-aain-iyé. Maníkó Mósesembo simámakain-
amaamba ímba kanaa'á arááiwaéntafesa
Maníkón-aúranka'a ímba arupise úmai mésa
puwí-ámpá'á wégofó Maníkóní ámútanko
ímáyáasa símísata Káráisitin-aaísafeta érai'e
séta aúí'a úmaisa maé'maeta wéune.

⁷ Naaófá'á Maníkó Mósesemba óntan-
kwandaaiya'a siyáánkai-amaamba agai-
ámakaimba minamáámbá arááiwaenae sésa
umbá ímba kanaa'á arááiwaesa taráímae
iyésa mindásafesa puwí-ámpá'á wégowe.

Maníkó Mósesembo áamáambo simámakonka'a Maníkómpákembá sáma paápé éna Mósesen-óika'a sáma paápé úwana óntan-kwandaaiya'o siyáánkai-amaambo agaimarómba maimaéna Ísareri-waasifa'a kumúwasa Mósesen-óika'a sáma wéna póna tógáyáagaya úwasa ímba kanaa'á awánowana ánaaemba uwákuraiye.

⁸ Naaófá'á Maníkó Mósesemba siyáánkai-amaambo simámakonka'a Maníkóní sáma paápé uráifo káfé'a Maníkó wení ámútankomba ai'maráísana wení waási tirumpimbá méraiye-aai paápé ímbá póna Maníkóní sáma óraa'an-iyé.

⁹ Maníkó Mósesemba siyáánkai-amaamba simámakaimba pósa ímba kanaa'ó arááiwaéntafesa puwí-ámpá'á wégowe. Maníkó minámáan-ááímó paápé únka'a wení sáma wérowana káfé'a Maníkó wení ámútanko wenaúranka'o arupíse uwátínkáin-aai paápé isaná póna wení ságoni fasi'aémbá óraa'a wéraiye.

¹⁰ Káfé'a aú-aai símaimo kááísamakain-aai wéraisana íyáákarai-sagoni fasi'aémbá wéraimba póta séta Maníkó Mósesembo siyáánkai-amaambo simámakai-sagoni fasi'aémbá sáwísamba iyésá súne.

¹¹ Maníkó Mósesembo simámakain-aai wááu-aain-ifo aú-aai símaimo kááísamakain-aai waé'wae'o índá óraa'-aain-iyé. Wááu-aai simámakonka'a ságoni fasi'aémbá wérombanifo káfé'a waé'wae'a índá-aai paápé isaná póna óraa-sama fasi'aémbá wéraiye.

¹² Mináái fasi'aén-áái waé'wae'o índá-aai

ísaraunda póta ímba sáá'a isatá óraaka'a minááísá wésimatimune.

¹³ Mósesemo uráintemba ímba miyásá wéune. Mósesé Ísareri-waasisafena séna kesóipa'o wéráisama uwá'wimba awánaafo séna ampantasámbá óika'a káataraiye.

¹⁴ Ísareri-waasi táá'-aantemba

isésa tirunté'a marésa maé'ómba pósa káfé'o méraan-kwaasi Maníkó símaimo kááísamakon-aai aúfáífinkemba toráumai isésa minááígóní áwáuma ímba kawé'-úmai wéisaawe. Mósesemo óipa'o ampantasámbá káátamakowasa sámó ímbo awánaraantemba káfé'a Maníkón-aai aúfáífimbo toráúsómba miwítí imáyáago fáíkuraaisana kumeu'á isasá pósa mináúfáígóní áwáuma ímba awánamai kawé'á wéowe. Ísu Káráísitiye'a kááísamai méraawi Maníkón-aai-aufai torausésa minááígóní áwáuma kawé'-úmai wéisaawe.

¹⁵ Káfé'o méraan-Isareri-waasiwara'a Maníkón-aai Mósesemo agaimakáin-aaimo toráúsómba miwítí imáyáago fáíkuraaisana kumeu'á isasá pósa minááígóní áwáuma ímba ísáafo

¹⁶ Fasi'aénkó Ísu Káráísitimpá'o tembá minkúméú'á taí'áínkakemba minááígóní áwáuma kawé'-úmai wéisaawe.

¹⁷ Fasi'aénkó Ísu Káráísitiye'o súnda wení ámútankontafe'a sune. Fasi'aénkóní ámútanko tirumpimbó méraiwai sáwí-imayaagomo ta'ótokaimpinkemba faútínkáísasa kawé'-úmai méraawe.

¹⁸ Ísareri-waasiti imáyáago ímbo kawé'-úmaimo ísaraantemba kentáásí imáyáago

ímba miyá isanasá Fasi'aénkóní ságo kentáá sása wégasinkaiye. Fasi'aénkó Ísu Káraísitini ámútanko kentáásirumpimba ména wenkáání'a uwásinkenasa wení sama siménasa miyá úmae wéiyiye.

4

*Sawefimbo wímakaawanamo ááémo
kará'wintemba miyaráántáámó únda-aai.*

¹ Maníkó aruntá uwásinkenasa mindásafena kesí kisau máéro séna símakaisata wenáái simátimundasa ímba suwesarain-iyé séta wétuwaumpo

² wenáái simátíméndasafeta aúpá'ó tigaesáfésamo ombá sínaaemba uwámeta ímba karo'á simátiyuweta Maníkón-aagomba waé'mai-aai ímba simátimeta Maníkón-aúranka afora'á érai'-aai simátimunasasa suwánésasa érai'-aai aantemba wésewe tirumpinkémbó síyantafeta Maníkón-aúranka'a miyásá sune.

³ Ásé-aai afora'ó simátimundasa minááígóní áwáu ímbo isésamo ésa miwí Maníkóní némpa'a mésa puwí-ámpá'ó wégowin-owe.

⁴ Waántáwanko marapá'ó káráwiyaiwai miwítí imáyáa kumeu'á uwátínkáísasa Ísu Káraísitin-aaisafesa ímba timankúnkúmba wéowe. Waántáwanko séna Káraísitin-aago sama kátínkáífo séna miwítí imáyáa kumeu'á uwátínkáísasa Káraísitini sama ímba wéawanaawe. Maníkómó méraintemba Káraísiti miyá isaná waántáwanko séna Káraísiti sama kátínkáífo séna miwítí imáyáa kumeu'á wéuwatinkaiye.

5 Kesáá ímba óraa'-waasi úmpo Ísu Káraísitintafe'a kentáási óraakon-ye siyantafeta wenáái kosimátimeta wení kísau-waasisa méraunda póta wétuwa'nai-une.

6 Áwáura'a kumeu'á úwana Maníkó sama kaaó súwana samo karáimba wemá samo kásínkáíwaisaan-ye. Ísu Káraísiti ói'-imayaa úndasa Maníkóni fi'oran-awaumo awánaandasafena sása wégasinkaiye.

7 Kesáá ímba fasi'aréta ásé-aaisa ta'ótokaumpo sawefimbó wímakaawanamo ááémo kará'wintemba miyá éta ásé-aaisa ta'ótokaumne. Suwánésa minááígómó iyáákarai-fasi'aenkomba awánésa sésa ímba miwífínkémbán-ifo Maníkómpáké-fásí'áémbán-ye siyantafeta ímba fasi'éta mifási'áéntá ta'ótokaumne.

8 Namuro-wáásímó tínkamiyantafesamo úkóntemba fi'o-fi'on-umbai-tantaako kentáá úkúraa isatá tu'ma'ó wérainpinkenta mótuweta wégune. Tuwímbai-kanaa séta nóra sétaawa Maníkóni kísau wémaumno séta ímba ifátá tukáumne.

9 Sáwíta uwásínkáámbanifo Maníkó ímba siyúwáísata méraumne. Sínkamomba ímba tai'ásuwaawata úwoisa súnaraumne.

10 Ísumbo sáwí'o uwánkesamo tufúwanamo pukáin-ampata kúndasa pósa Ísu maé'mae'a isaná wení fasi'aémbá kentááfimbó wérain-aai wéisaawe.

11 Méraundasa aasiyaasi-kánáá séta Ísuni waási-i'a úndarakemba káféra sínkamiyata puwónaumno súndasa pósa kesáá méraundawini áwáuma Ísu póna kentáá súma tai'áínda-sufimba

méraiye-aaí wéisaawe.

12 Ásé-aaí simátimundasa sáwíta uwásinkesa
sínkamiyata púwónda-ampata kúndasa
mindásafe'a ásé-aaí isé'a aúí'a úmai méraan-
ampa'a wégowe.

13 Naaófá'á Maníkón-aaí aúfáífimba
agaimaréna sēna

Maníkón-aaísafe'a simankúnkúmba
é'a pó'a wenáái wésimatimune

siyáintemba Maníkón-aaísafeta
simankúnkúmba éta wésimatimune.

14 Fasi'aénkó Ísumba pukómpinkemba
íyáfasinankaraiwai Ísunte'a kááísisinkenasa
púwóndafinkenta íyáfasisinkenasa kentááwé
kembíwíyé sí'maisa wenaúrankata sinkáíniye.

15 Kísausa wémaundasa sáwíta
uwásínkáámbanifo túwa'nai eta ímba
ifátuwaunasasa fí'o-fi'on-kwaasi Maníkó úwoimo
túwa'nai in-áái isésa sáwífa'nanka Maníkómpá'á
súwi símae iyésa wenáwí'a óraa'a úmae wéiyowe.

Maníkóní fasi'aénkátaámó méraunda-aaí.

16 Mináái imáyáa úndasa ímba suwesaráin-
iye séta ifátukaumne. Kentáá súma sáwí'a
úmae íyísana Maníkó kentáásí imáyáa aúíta
wéuwasinkaiye.

17 Kentááfá'ó wérain-umbai-tantaatafeta séta
kárí'-umbai-tantaa'a wááu wéraiye sūnanasa
ánaaemba minúbáífínkémbá fí'oran-kawe-
tantaa'a íyáákaimba waé'wae'o índa-kawe-
tantaa'a paápé íniye.

18 Mindásafeta marapá'ó awánáúnda-tantaa'a
ímba óraa'-imayaasa éta wíyómpa'o ímbo

awánáúnda-tantaatafeta imáyáa úmae wéiyune.
 Awánáúnda-tantaa'a wááu-tantaa'an-ifo
 wíyómpa'a ímbo awánáúnda-tantaa'a waé'wae'a
 íníye. Mindásafeta umbai-tántáátáféta séta
 sáwísamban-iyé sune.

5

¹ Kentáásúma wááu-nankaanta isatá
 misúwawaa'warata marapátá méta maarán-áái
 sune. Maankwááu-námbá tawisínata Maníkómó
 wíyómpa'o úmakain-daumpata ménaumne.
 Mindámbá waási ímbo úmakaan-damban-ifo
 Maníkó wení imáyáafinkemba úmakaimba
 waé'wae'o índa-namba mindá wíyómpa'o
 méraanda-suwawaa'an-iyé.

² Marapá'ó méraundasa óraa'-imayaa éta
 wíyómpa'o méraanda-suwawaata simínkwaesa
 séta

³ maarán-áái ínta séta puwéta súwawaa'-
 íyainkaanta úmaisa méraumne ímba súmpo
 maarán-áái séta wíyómpa'o méraanda-
 suwawaata naankáántá ónaesa sune.

⁴ Kentáá súma wááu-nankaamba isatá
 méraundasa umbai-tántáá'ó wéráintafeta óraa'-
 imayaa éta marapáké-súwawaataamo túwáanda-
 aai ímba séta wíyómpa'o méraanda-suwawaata
 máénda-aaisa sune. Miyásáámó ondá marapáké-
 súwawaakaanta faú'wínata maé'maeta ónaumne.

⁵ Miyásáámó ondasáfénasa Maníkó
 kentáá to'mayaa éna wení Ufaen-ámútámbá
 ai'marówana kentáásirumpimba kumbéraisata
 mindásafeta to'mayaa uwásínkarainta miyá
 íníyesa sune.

⁶ Maníkó wení ámútamba ai'marówana kentáásirumpinta kumbéraintafeta kentáási imáyáa fasi'ámaisa méraumne. Marapá'ó méraundasa Fasi'aénkó Ísu Káráisitiyeta ímba wíyómpakaani'a úmaisa méraumne.

⁷ Káféta marapá'ó méraundasa wenane'á ímba awánéta wenááisafeta simankúnkúmba éta

⁸ kentáási imáyáasa fasi'éta puwétaamo wíyómpa'o Fasi'aénkó Ísu Káráisitiye'o métaara aamoí úsino.

⁹ Maanká'ó méraundasaawe wíyómpa'o iméraandasaawe Maníkómbó arááímo tainí'a ónae súndasa póna aamoisá uwásinkainiye.

¹⁰ Seyaafá'nánkátá Ísu Káráisitin-aúranka'a méraananasa kesáámó méraundawini áwáusafena síesai ena marapá'ó méraamba kawé'ó owí kawé'-mékámbá tíména sáwí'o owí sáwí-meyambo tímínda póta wembó arááímo wétaini'a ónaesa súne.

Ísuwe kááísamaimo méraundasa aúí'a úmaisaamo méraunda-aai.

¹¹ Fasi'aénkó méraundawini áwáuma síesai índasafeta wentáféna sáá'a wéisata wempá'á tíwae séta waásisa wétafisune. Maníkó méraundawini áwáusa suwánaisa'a kembiwísé'o méraundawini áwáusa suwánaamba kawé'á wéiye súne.

¹² Kentáá súwí'a ímba maimaé wéiyumpo méraundawini áwáusafe'a aamoí íyantafeta méraundawini áwáusa wésimatimune. Aamoí é'a kentáásáfésamo sáwí-aaimo sen-kwáási táái kanaa'á anondáá simátimiyantafeta méraundawini áwáusa wésimatimune. Minkwáási

paáká-túwawaa'-aantemba tuwánésa kawel'-wáásín-owe sésa tirumpin-ímáyáá ímba awáresa kawel'-wáásín-owe wésewe.

¹³ Tuwímbai kentáásáfésa uwóí'a wéowe sewatá kanaán-iyé sэта Maníkóntáféta imáyáa éta miyásá únasasa tuwímbai kentáásáfésa kawel'-ímáyááwárá'-wáásín-owe sewatá kanaán-iyé sэта kembiwisáféta imáyáa éta miyásá wéune.

¹⁴ Seyaafá'nánká sáwí'o ombá mimbéyámbá maésa púwófo sэna Ísu Káráisiti mimbóráwígó kentáásáfénawe sэna pukáimba póta Káráisiti

arumbó símíwaini kísau aantenta wémaumne.

¹⁵ Seyaafá'nánkátá sáwí-imayaago talótokaimpinkemba faúsinkaindasafena Ísu Káráisiti pukáimba póta

kentáa sirááimo táínda-i'a ímba éta wembó arááimo táínda-i'a éta méraano. Miyámó ondasáfénasa kentáásáfénawe sэna puwúwana Maníkó iyáfasinankaraiye.

¹⁶ Ááema marapá'ó méraan-kwaasiti áwáuma arááíwaeta tuwímbaisafeta kawel'-wáásín-owe sэта tuwímbaisafeta sáwí-waasin-owe siyáumpo káfé'a ímba miyásá sэта ááema marapá'ó méraan-kwaasiti áwáuma arááíwakaunda Káráisitintafeta úwoi-waasin-iyé siyáundasa káfé'a ímba miyásá sune.

¹⁷ Mindásafeta Ísu Káráisitiye'o kááísamaimo méraundasa aúí'a úmaisa méta ááemo uráundanten-imayaa ímba éta káfé'a aú-imayaa úmaisa méraano.

¹⁸ Maníkó miyá wéifo ááema Maníkóni namuro-wáásíyáámbá úmaisa méraawananasa

Maníkó kesí waási-i'a íwae séna Ísu Káráisitimba ai'marówana kentáásáfénawe séna kumpuwúwana wení waási-i'a uwásinkenasa séna kesí waási-i'a íwae-aai kosimátíméro séna si'mákaisata minkísáúsá wémaumne.

¹⁹ Minááígóní áwáuma maarán-iyé. Ísu Káráisiti seyaafá'-wáásísáfénasa imáyáa éna pukáimba mindásafena Maníkó imáyáa éna waásimo sáwí'o ombá ímba aafimbá wémaitinkaifo wení waási-i'a uwátinkena kentáásáfénawe séna kesí waási-i'a íwae-aai kosimátíméro séna si'mákaisata wésimatimune.

²⁰ Kesáá Ísu Káráisitini aantá-waasisa únanasa simásímísata kembiwísá wésimatimune. Maníkó kembiwísáféna óraaka siyáísata siyáin-aaisa wésimatimune. Káráisiti pukáintafena Maníkóní namuro-wáásíyáámbá uráampinkemba wení waási-i'a wéuwatinkaifo wenááísafe'a ewé seró.

²¹ Ísu Káráisitimpimba sáwí'o í-áái ímba wérowana

Maníkó kesáámó sáwí'o únda-aai wembá ámakaiye. Káráisitiye'a kááísamai méta Maníkón-aúranka'a arupíse ondasáfénasa Maníkó miyá úwana Káráisiti kesáámó sáwí'o únda-aai maimaéna mindánankwara'a pukáimba póna Maníkó wení namuro-wáásíyáánní'a uráundawi wení waási-i'a wéuwasinkaiye.

6

¹ Maníkóe'a taankarotámai méta kísau wémaeta óraaka simátíme séta Maníkó úwoi wétuwa'nai-ifo ímba úwoi mé'a wembó arááímo tainí'a oro sùne.

² Naaófá'á Maníkón-aai aúfáífimba Maníkómó siyáin-aai agaimaréna séna

úwoi túwa'nai uráunda-kanaa kentáái
isé'a sáwí'o urómpinkembo
tikaunda-kanaa túwa'nai uráumne

Maníkó siyáiyé agaimaréna siyáimba
mindásafe'a ísáaro. Káfé'a Maníkó úwoi túwa'nai
in-kanaa éna sáwí'o uráampinkemba tíyáín-kanaa
imbá pó'a ímba úwoi mé'a wembó arááímo tainí'a
oro.

³ Kentáásí kisaugomba awánésa sáwí-amba
arááíwáéfo séta kawé-kísáú aantembo maúndasa
pósa ímba érai'a sésa sáwí-kisau máéwe wésewe.

⁴ Seyaafá-kísáúmó maúndasafeta séta
suwánésasa érai'a Maníkóní kisaú-waasin-
owe siwae séta minkísáú wémaeta méraumne.
Umbai-tántáá'ó kentááfá'ó tisasamó sí'o índa-
í'o uwásinkesasa sáwí'o uwásínkáanta ímba
ifátuweta fasi'ámaisa méraumne.

⁵ Maníkóní kisausa maúndarakemba sínkambai
ándáfa'o mósinkesasaamo úkúresamo sáwí-aaí
simásinkesa miyámó ontá óraa-kisau maéta
nó'waamba ímba súsa waúnda úwoi kisaú maéta
sááímo taintá ímba ifátuwaunda fasi'ámaisa
méraumne.

⁶ Kentáásáfésa Maníkóní kisaú-waasin-
owe síyantafeta kawé-kísáú aantemba maéta
kawé'-ímáyáá éta faru úmaisa méta kawé'a
uwátinkaunanasa Maníkóní Ufaen-ámútánkó
keséta méraisata érai'a miwí-ímáyáá éta

⁷ érai'-aai simátimunanasá Maníkó fasi'aémbá
símísata miyán-kísáú maéta Maníkón-
aúranka'a arupíse úndasa mindá wenónkáámbá
fafériyaunanasa sáwí-aaigo kentááfímbá ímba

tisatá Maníkón-aúranka'a arupíse úndasa
mindá paroiyáámbá uwásoketa umbai-tántáá'ó
kempátáámó tintá wéiyaakaumne.

⁸ Tuwímbai kentáá súwí'a mósá máraáwasa tuwímbai kentáá súwí'a símai sáwí'a owasá tuwímbai kawel'-ááísá simásíméwasa tuwímbai sáwí-aaisa simásíméwasa érai'-aaimo simátimundasafesasa tuwímbai kentáásáfésa karo'á sewé sewasá

⁹ tuwímbai kawel'-úmai suwánésasa karo'á sésa úwoi-waasin-owe sewasá tuwímbai kentáásáfésamo puwónaesá owémó sembá ímba puwúndasa úwoisa súnaraumpo suwánaaro. Maníkó arupísesa uwásínkáimba ímba sínkamisata wépuwune.

¹⁰ Sáwífa-tantaako kentáásirumba umbái wétasinkainta kentáásirunko kawel'á wéiye. Kesáá óntama ímbo makáundawisa éta Maníkón-aai sáwífa'-waasiša simátimunasasa kawel'-úmai méraawe. Óntaiyaiwai éta Maníkón-aai talótokaundasafeta kawel'-úmaisá méraumne.

¹¹ Kórinti-naopaken-kwaasi ísáaro. Ken-ímáyáá éta kentáásirumpinken-aai afora'á simátímakaundasa

¹² kembiwísáféta ímba kaoráúna'a kentáásáfé'a kaókaawe.

¹³ Kesí iyámpóímo simátimundantenkaamba simátimumpo ken-ímáyáámó úndantemba kentáá-ímáyáá é'a kentirumpinkén-áái simásíméro.

Maníkóní naankaantáán-únemo siyáin-aai.

¹⁴ Ísáaro. ó'ó tombá moórá óraa-purumakawara moórá kári-purumakawara'a ímba fátóto úmai wégara'ofó awaiya-púrúmakarái tinuwarampimbá kará'umakaawasarai ó'á wétoye. Miyámó ontembá kembiwí Maníkón-aaisafe'a timankúnkúmbo owíyé ímbo timankúnkúmbo owíyé ímba taankarotaré'a

kísau máéro. Arupíse owisé Maníkón-aai taráíyaawise ímba kanaa'á taankarotámai mésa kísau wémaewe. Sáwara kumeu'wará'á ímba mimbóráfímbá wéraiye.

¹⁵ Ísu Káráísitiye waántáwankoe ímba mimbórá-ímáyáá óyasa Maníkón-aaisafesa timankúnkúmbo owíyé ímbo timankúnkúmbo owíyé ímba mimbórá-ímáyáá wéowe.

¹⁶ Maníkóní naaúmpa'a waántá-waasi mimbóráfímbá ímba méranaawe. Maníkó fasi'aénkwáráwí kentáásirumpimba méraisata wení naankaantáán-úne. Minááisáféna naaófá'á Maníkón-aai aúfáífimba agaimaréna séna Maníkó séna

kesí waásise mé'a miwífímbá wéne'a miwítí Maníkó onasá kesí waási-i'a ónááwe Maníkó siyáíye.

¹⁷ Mindásafena Fasi'aénkó séna úwoi-waasifinkemba tiyuwé'a moórá-aempa'a mé'a sáwí-awaugomba tínaaemba uwátimiya'a tíke'a

¹⁸ kentifo-í'a ona'á kesáánintone kesiyáámúntoni'a ónááwe.

Fasi'aénkó seyaafá-fásí'áémbó tokáiwai siyáíye agaimaréna siyáíye.

7

¹ Kesí waási ísáaro. Maníkó kentáásáféna ímáyaá éna mináái símai kááisamakaintafeta kesúrake-sawi-tantaa'e kentáási ímáyaafinke-sawi-tantaa'e sínaaemba uwámeta kawé'-úmaisá méta Maníkón-aúranka'a sáá'a isatá Maníkóndé-i'a éta kawé'-aantenta éta miyásá onó.

Póron-arunko aamoimó uráin-aai.

² Kentáásáfé'a ímba kaórémba kentáá-ímáyáá úwoin-oro. Ímba sáwí'a uwátinkaawanasasa sáwí-amba arááiwakaawe. Ímba karo'á simátinketa miwítí óntasa mémaiyaumne.

³ Minááímó simátimunda ímba aaifimbá maitinké'a sune. Ken-ímáyáámó úndasa simátimeta aneka'á miyásá úne séta úwoimo méraundasa ken-ímáyáá éta púwónda-kanaa tinda úwoi ken-ímáyáásá ónaumne.

⁴ Érail'a kawé'-úmai méraawe óraaka sé'a kentúwí'a mósá wémaraumne. Óraa'-umbai-tantaa'a kentááfá'ó timbá mindásafe'a ímba ímáýáa é'a ken-ímáyáá únana kentááigo fasi'ásínkáísana sirunkó áfááraumai aamoí wéiye.

⁵ Tóróasi-naopa'a tuwéta Máséndóniyaa-marafa'o tamaéwánda ímba kawé-kánáá úwata méraawanasasa seyaafá'-náópimpa'a kaentónáántón-ésa aaisambá suwaná kentáási kísausafena kentáásirunko umbai tówana

⁶ Maníkó tirunkó umbaimó tain-kwáási tiráfayaiwai wesá siráfaindasafena Táításimba ai'marówana kembiwí tiyuwéna kentááfá'á téna

⁷ maafá'ó túntafeta aamoí éta kembiwísé'o maún-kawé'-aai simásimuntafetaawara'a aamoí ówánanasa kembiwí kentáá suwánánaemo siyáamba tasimásimenasa sáwí'o uráantafenamo kentirunkó umbaimó taráimba tasimásimenasa kentáfésamo karo'-ááímó sen-kwáási táái anondáá simátímakaamba tasimásimenasa miyán-ááísómbó tasimásimuwata isááwánanasa kentáásirunko aamoí uráíye.

⁸ Aúfái agai-timé'a óraaka sé'a aneka'á ímba miyán-oro siyáunda mináúfái toráúsúwana

kárika'a kentirunkó umbaí tówa'a mináái isé'a mináúfái agaiyáundasafena sirumbá uwátinke'a káfé'a sirunkó ímba umbaí téna

⁹ kawe'a wéiye. Kentirunkó umbaí tóntafe'a ímba aamoí é'a kentirunkó umbaí tówa'a sáwí'o ombó tínaaembo uwámakaantafe'a aamoí úne. Sáwí'o ontáféna tirunkó umbaí táino Maníkó wésiye. Mindásafe'a mináúfái agai-tímakaunda ímba sáwí'a uwátínkaraumne.

¹⁰ Maníkó tirumbá umbaí tátínkáíwai sáwí'o ombá tínaaemba uwáméwana sáwí'o úmaimo méraampinkemba Maníkó tiyéna kawepá'a mówétinkaisana mindásafena tirunkó ímba sáwí'a wéifo marapá'-wáási Maníkóntáfésa ímba imáyáamo owí tirunkó umbaí tainká'a sáwí'o ombá ímba tínaaemba uwámesa úwoi sáwí'a ésa Maníkóní némpa'a maé'mae'a ónááwe.

¹¹ Sáwí'o uráantafena Maníkó kentirumbá umbaí tátínkaraimba pó'a kawe'ó uráamba imáyáan-oro. Kembiwífínkémbá moóráwigo sáwí'o uráimba ímba óraaka simánke'a tímakaunda-aufai isé'a sé'a arupíse uwátinketa kawe'-ámbá arááiwaéno sé'a sáwí'o uráantafe'a tigaesáfé é'a sáwí-meyambo kentópa'o tindasafe'a táátafe é'a sé'a arupíse uwátínkáanana Póromo ménamo éna súwa'nai íniye sé'a sáwí'o uráiwaimba ááéma sáwí-meyamba amé'a kembiwífínké-sáwí-imáyáá arupíse uwátinke'a miyámó uráamba taí'áraiye-aai ísaraumne.

¹² Mináúfái agai-tímakaunda sáwí'o uráin-kwaasigontafe'a ímba aifa'á imáyáa é'a sáwí'o uwánkarain-ininkontafe'a ímba aifa'á imáyáa é'a miyá uráumpo Maníkón-aúranka'a kentáásáfé'a óraa'-imayaa é'a kentáásáfé'a sé'a miwísáféta

óraa'-imayaasa úne sénááwe sé'a mináúfái agai-tímakaumne.

¹³ Mináúfáimó tímakaundantembo uráamba kentáásí imáyáa kawel'á uwásínkaraawe.

Táitásimba ai'marááwánanasa kempá'á koména wenarunkó umbaí tówana túwa'nai úwa'a kawel'á uwaná aamoí éna wenarunkó kawel'á úwana kentááfá'á téna tasimásimuwata iséta mindásafetaawara'a aamoisá úne.

¹⁴ Ááema Táitásin-aúranka'a kentúma maimaé iyáunana simátímakaunda-aai érai'-aaimo siyáundantemba Táitásimbo kentááimo simámakaunda-aai érai'an-iyé. Táitási kembiwísé'a koména kemó kentááimo simámakaunda-aaisafena érai'-aai siyáiyé siyáimba mindásafe'a ímba sigaesáfé'a úne.

¹⁵ Táitási kembiwísé'a komérowa'a wentáfé'a aamoí é'a táátafe'a é'a tinekembá tata'á é'a wenáái isé'a miyá uwaná mindásafena Táitási imáyáa éna arumbá wétimiye.

¹⁶ Kembiwísáfé sé'a seyaafá-kísáúmó ésa kawel'á ónááwe súnana sirunkó kawel'á wéiye.

8

Fasi'aénkóní waásimo túwa'nai uráan-ai.

¹ Kesí waásisono. Máséndóniyaa-marafa'o naaó'-nao'o méraawi Maníkóní waási wemó túwa'nai

ín-aai simátimenaumpo ísáaro.

² Óraa'-umbai-tantaa'a miwífá'á téna tafisisasá ímba ifátuwesa Maníkóntáféna tirunkó kawel'á úmae iyísasa miwí kesáfésa óntaiyain-kwaasi méraantafesa ímba imáyáamo ombá Yúndiyaa-marafa'a Fasi'aénkóní waási méraawisafesa

imáyáa ésa kári'-ontamo makáampinkemba sáwífa-tantaa'a túwaandu úmai túwa'nai uráawe.

³ Érai'-aai simátimune. Miwí sésa maarán-tántáá'á kanaa'á timénaumpo fí'omba túwaandu úmai timénae sésa miwítí imáyáafinkemba miyá ésa sáwífa'a tímakaawe.

⁴ Kentáásáfésa óraaka símae iyésa sésa Yúndiyaa-marafa'o Fasi'aénkóní waási méraawi timénae sétaamo únda aamoí úne siyáawe.

⁵ Imáyáa aantembo únda-tantaa'-aantemba ímba tímakaafó fí'o-fi'on-tantaakwara'a tímésa aifa'á Fasi'aénkóntáfésa sésa ení waási-i'a éta ení kísausa wémaumne siyésa Maníkón-imáyááfinkembá kentáásáfésa sésa Maníkóní kísau simásimiyata kembiwísé'a méraano sésa

⁶ maanká'á Máséndóniyaa-marafa'o méraawi miyán-áái siyáamba póta Táításimba simáméta séta Yúndiyaa-marafa'a Fasi'aénkóní waási túwa'nai íyan-kísau Kórinti-naopa'a ko-ómbare tauweré kuré túwa'nai inasá túwaandu íyana tai'áino Táításimba simámakaumne.

⁷ Fí'o-fi'on-kísau kawel'-úmai maé'a Maníkón-aaisafe'a fasi'ámai timankúnkúmba é'a wenáái kawel'-úmai simátimé'a wenááigoni áwáuma kawel'-úmai isé'a aaweyáá é'a túwa'nai e'a kentirumbá simé'a miyámó on-kwáásí ontáféta simátimé séta Yúndiyaa-marafa'a Fasi'aénkóní waásimo méraawi túwa'nai iyamba kawel'-úmai timénááwe sune.

⁸ Maanká'á Máséndóniyaa-marafakewi Yúndiyaa-marafa'a Fasi'aénkóní waásimo méraawisafesa imáyáa ésa kawel'-úmai tímakaan-aai tíménda miyán-oro ímba súmpo timénáá ina

timénááo sé'a kentirunkómbá tísai úmai isáúmne.

⁹ Kentáásí Fasi'aénkó Ísu Káráísiti úwoi túwa'nai imbá isaraawe. Wíyómpa'a fí'oran-kawe'a úmai ména kembiwísáféna imáyáa éna wíyómpa'a tuwéna kawé'-úmaimo méraiyantafena úwoi-waasiyaan-úmai marapá'á kumbaé'éimbaniye.

¹⁰ Kesí imáyáafinkemba sumpo isáaro. Ááéma Maníkóní waásifinkemba kembiwí aifa sé'a túwaandu úmai timénae sé'a ómbare'a moórá-aatai maisukááfo káfé'a minkísáú taí'ásuwaaro.

¹¹ Ááéma aamoí é'a to'mayaa é'a káfé'a miyá é'a sáwífa-tantaa'o makéwi sáwífa'a maráiyasa kári'o makéwi miyáumai maráiyasa miyá íyana tai'áino.

¹² Sáwífa-tantaa'o máréne kári'o máréne Maníkó tuwánáinifo timénaemo síyan-tantaa'a sáwífa-tantaapinkemba sáwífa'a maré'a káripinkemba kári'a maré'o timíyamba Maníkó awánéna kanaán-iyé síníye.

¹³ Túwa'nai íyamba ímba seyaafá'ó túwémba kesáfé'a wémare'a oro.

¹⁴ Énifo káfé'a makáan-tantaa'o wéraintafe'a mimpínkémbá timé'a ánaaembo ímbo makémba miwí kembá túwa'nai íya'a awaiyarí'a ónááwe.

¹⁵ Miyáumai naaófá'á Maníkón-aaí aúfáífimba agaimaréna moórá-tonkon-awí'a máána mintóntáféna séna tóntáféna séna sáwífa'a tú'maimo nowí tímú'a fówasa ímba aráá'a márówasa kári'a tú'maimo nowí tímú'a fówana ímba táái taráiyé

agaimaréna siyáiyé. Miyáumai káfé'o makén-tantaatafe'a mimpínkémbá timé'a ánaaembo ímbo maráiyamba miwí kembá túwa'nai ónááwe.

Táitási Kórinti-naopa'o kuráin-aai.

16 Maníkó Táitásimba imáyáa ámisana kemó túwa'nai úndantemba wewará'á túwa'nai ónae sisatá mindásafe'a Maníkómpá'á súwi sune.

17 Táitásimba simámeta séta kotúwa'nai inasá Yúndiyaa-marafaken-kwaasimo túwa'nai íyantafesa tuwímbai-tantaa'a túwaandu úmai maránaáwe súndasafenasa aamoí éna wení imáyáafinkenkwara'a séna aneka'á miwísé'a koménaumne Táitási siyáiyé.

18 Táitásimbo ai'maráandara'a moórá-waasiwara'a ai'maráanana wesé'a wíniye. Wemá ásé-aai simátíma'mae nísasa naaó'-naokemba Fasi'aénkóní waási wenáwí'o mósá marááwi wemá Táitásiye'a wíniye.

19 Fasi'aénkóní waási naaó'-naokemba wembá íyáfasinankesa sésa esé'a minkísáú mauwó sewaná keséta wénena túwa'nai únda-kisaua máisasa kentáásí kisaugomba awánésa sésa tómbá ímbo makáan-kwaasi túwa'nai owe sésa Fasi'aénkón-áwí'a mósá wémaraawe.

20 Minkísáú mó maúndasa sáwí'an-owe sefó séta

21 Fasi'aénkón-aúranka'e waási túranka'e minkísáú kawé'á ónae séta naaó'-nao'a wéneta túwaandu úmáráan-ontantomba maimaéta ímbo makáan-kwaasimo túwa'nai ondasáféta úne.

22 Minkáé'nárimo ti'maráandarata moóráwigonkwara'a ai'maráanana wéna kaumbosé kóinda wembá sáwífa-kanaa áisai

úmai awánánae súndasa túwa'nai in-kwáásígó isatá awánaraumne. Kembiwí kawel'ó on-áái iséna póna kotúwa'nai ónae siyáíye.

²³ Táításin-aai súnda kesé'a taankarotámai ména túwa'nai índasafena kesé'a kísau wémaíye. Wesé'o wíyan-kwaasi-taaimo súnda minkísáú maíyantafesa naaó'-naokemba Fasi'aénkóní waási kerái íyáfasintinkaraayasaraí Ísu Káráísitin-awi'a mósá wémaraaye.

²⁴ Mindárau kempá'á koméraiya'a tirumbá tíméro. Kentúmo maimaé iyúndasafesamo sésa érai'a kawel'-úmai méraawe sésa ánaaemba naaó'-nao'a Fasi'aénkóní waási kosimátima'mae níyasa kentáái isánááwe.

9

Fasi'aénkóní waási túwa'nai ónaemo siyáan-aai.

¹ Tuwímbai-tantaa'o túwaandu úmaimo Yúndiyaa-marafa'o Fasi'aénkóní waásimo timíyan-aai é'o ísaraantafe'a maanáúfáífimbá ímba ayáátááka'a simátimenaumne.

² Túwa'nai ónaemo siyáan-aai ísaraumne. Máséndóniyaa-marafaken-kwaasi kentááimo simátimewanda kentúma maimaé iyé'a kembiwisé sé'a Ákáyaa-marafaken-kwaasi minkísáú wéto'mayaan-esa moórá-aatai maisukáawe séwánasa isésa sésa kesááwará'á túwa'nai ónae sésa tuwímbai-tantaa'a túwaandu uráawe.

³ Kentúma maimaé iyéta séta minkísáú to'mayaa úmakaawesa súnda-aai úwoi-aain-íye sefó séta kaumboráú ti'maráanasa kempá'á

kónááwe. Kemó siyáundantemba to'mayaa úmaraiyantafeta minkáúmbóráu ti'maráanasasa kotúwa'nai ónááwe.

⁴ Ánaaemba kempá'á konasá Máséndóniyaa-marafakembo tuwímbai kesé'o wésamo ésa ímbo to'mayaa úmakembo kotuwánaiyamba tigasáfé'a íya'a to'mayaa úmakaawemo siyáunda-aaisafe'a sigaesáfé'a ónaumne.

⁵ Mindásafe'a imáyáa é'a mindárausafe'a óraaka simátíme sé'a kemó ímbo kuráandara'a miwífá'á koméwasa simaimo fasi'ámakaantemba tuwímbai-tantaa'a túwaandu úmáráaro simátímakaumne. Ánaaemba kempá'á kona'á kentí imáyáafinkembo túwaandu úmárémba úwoi maisiménááfo ímba tísai ónaumne.

⁶ Maarán-áái imáyáan-oro. Kísaumo ombá moórá kári-kisau úmakesa kári-tomba fáká'-naawasá moórá óraa-kisau úmakesa óraa-tomba wéfaka'-naawe. Miyáumaimo tímémba ánaaemba miyaráán-úmai maénááwe.

⁷ Miyáumai moórá-mora-wasimo timíyan-tantaatafe'a imáyáa uré'a miyáumai tíméro. Ímba timénae-imayaa é'a tíméfainifo. Óraa'-aaimo simásímakaine sé'a tíméfainifo. Imáyáa úmai kawé'-uré'a tíméro. Timíyantafesamo aamoimó iyawi miwí Maníkó aamoí uwátínkáifo timíyantafe'a aamoín-oro.

⁸ Maníkó kanaa'á áfááraumai kawé'ó uwátínkáimba seyaafá-tántáátáfé'a kawé'-úmai mé'a fí'o-fi'on-

kawe-kisau maíyantafena Maníkó áfááraumai kawé'á uwátínkáifo miyán-káwé-kísáú kanaa'á maénááwe.

9 Mindásafena naaófá'á Maníkón-aai
aúfáífimba agaimaréna séna
ímbo makáawi túwa'nai esamo tímatsuwaawi
miwítí kawe-kísáú waé'wae'a íníye
agaimaréna siyáíye.

10 Maníkó seyaafá'-ánáúntúmbá tímísasa
maiyésa wégisau-fuwandaawe. Maníkó
minánáúntúnkómbá óraa'a úmáráísasa wéfaka'-
naawe. Miyáumai Maníkó kawe'á uwátinkaina'a
túwa'nai íyana mimpínkémbá kawe-kísáú óraa'a
paápé íníye.

11 Maníkó kawe'á uwátinkaina'a aasiyaasi
kanaa'á túwa'nai íyasa simíyataamo tíménda-
tantaatafesa Maníkémpá'á súwi sénááwe.

12 Miyáumaimo túwa'nai íyamba Fasi'aénkóní
waási ímbo makáawi túwa'nai íyana sáwífa'-waasi
tirunkó kawe'á ínasa Maníkémpá'á súwi símae
iyónááwe.

13 Kembiwísáfésa sésa Ísu Káraísitin-aaisafesa
érai'e sésa fasi'ámai imáyáa ésa pósa súwa'nai
uráawe sésa Maníkón-áwí'a mósá marésa miwíyé
seyaafá'-wáásíyé úwoi timíyantafesa Maníkón-
áwí'a mósá marésa

14 Maníkémpá'á kembiwí óraa'o túwa'nai
intáfésa kembiwísáfésa imáyáa ésa túwa'nai
esa Maníkémpá'á inai sénááwe.

15 Maníkó seyaafá'-wáásísá fí'oran-
kawe'a uwásínkáísata póta wenáwíta mósá
wémaraumne.

10

Póro wení kísausafenamo simátímakain-aai.

¹ Kempínkémhá tuwímhai kentáfésa sésa Póro keséta taména faru úmai aaí siyáifo némpa'o mérainka'a fasi'aén-áái simásímiye wésewe. Ísu Káraísiti marapá'ó méronka'a faru úmai ména ímba aaisambó siyáintafe'a imáyáa é'a óraaka simátimune.

² Kempá'ó kondá ímba óraaka sénæ súmpo imáyáa é'a kempínkémhá tuwímhai kentáásáfésa karo'á sésa marará'-wáásítí áwáuma wéaraaiwaewemo sentáfé'a óraaka simátimenaumpo káráwiyo.

³ Marapá'ó méraundasa namuro-wáási iyáákanae sésamo týáántemba ímba miyá éta marapá-sáwí-tántáá'á iyáákanae séta Maníkóní kísaua wémaumne.

⁴ Taáne paroíyé úmakesamo tiyé'a iyáákanae sésamo ontembá ímba miyá éta Maníkó fasi'aémbá símakaisata fí'o-fí'o-sawi-fasi'aenta wéiyaakaumne.

⁵ Kentáá sááisafesa karo'-ááyémó sewí tááigomba kesááigosa wéiyaakaiye. Tuwímhai miwí túwí'a mósá marésa Maníkón-aaí isááfo sésa símai aambá fáí'maraawata aambó fáí'maraan-aaí iyááketa kentáási imáyáago Ísu Káraísitin-aaí isáínkwæ símaeta wéiyune.

⁶ Kentáá sáái isáíwæ séta timu'maréta mérauna'a miyá iyata tuwánéta kentáá sáái ímbo isááwi sáwí-meyamba timénaumne.

⁷ Kembiwímó méraawini áwáuma imáyáan-oro. Kempínkémhá tuwímhai sésa érai'a Ísu Káraísitini waásisa úne sentembá kesááwárá'á Ísu Káraísitini waásisa úmpo mindásafe'a imáyáan-oro.

8 Maníkó fasi'aémbá siménasa kembiwí ímba sáwíta uwátinkanaumpo kentí imáyáa fasi'átínkáándasafenasa mifásí'áéntá símakaiye. Mifásí'áémbó símakaimbo simátíma'mae iyúnda-aai mindá érai'-aai isatá póta mifásí'áémbó símakaimbo simátíma'mae iyúndasa mindásafeta ímba sigaesáféta úne.

9 Aúfáímo agai-timúnda ímba maarán-imáyáa é'a inkáísóro sénasa maanáúfái agaimái símiye sefó-imáyáa é'a agáúmne.

10 Tuwímbai kentáfesa sésa aúfáíimba fasi'aén-áái simásimenasa ááéma keséta taména aamoisaén-kwáásí ména úwoi-aaisa simásímakaiye sewí

11 miwí maarán-áái imáyáan-oro. Némpe'a méraunda póta aúfáíimbo simátimunda-aai kempá'ó wéta mimbórá-áái póta kosimátimenaumne.

12 Kentáfesa miyán-ááímó sewí miwí túwí'a mósá marésa óraa'-waasisa úne sewatá ímba mimbórá-wáásíyáántá éta miwímó méraawini áwáuma awánéta kesáá méraundawini áwáusa ímba tuwinéta séta kawé'-úmaisá méraumne. Sáwí'a úmaisá méraumne séta ínta tuwinánaumne. Miwí moórá-mora-wasimo méraawini áwáu tuwánésa miwítí imáyáafinkemba sésa méraundawini áwáusa kawé'an-iyé wésewe. Miyámó ombá sáwí-imayaafinkemba wéowe.

13 Kembiwífimbá Maníkómó símakainda-kisau-aai sénaumpo ímbo símakainda-aai ínta sénaumne.

14 Kembiwímó méraapa'a Maníkó ímba aambá faiyéna úwoi kesáái kosimátíméro

simásímakaisata úwoisa Ísu Káráísitini ásé-
aai kosimátímaukumne. Miyámó uráunda
Maníkó ímba aambá fáíkaisata úwoisa
kosimátímaukumne.

¹⁵ Maníkómó aambó fáisinkarain-kisausafeta
fí'on-kwaasimo maiyáan-kisausafeta kesáá
maiyaumne ímba séta kentáá súsa maimaé iyúne.
Ísu Káráísitin-aaisafe'a timankúnkúmba é'o
fasi'ámai imáyáamo úmae iyíyamba timu'maréta
méraumpo miyámó iyata áfááraumaisa túwa'nai
ónaumne.

¹⁶ Miyámó iyata kanaám-póta tiyuwéta fí'o-
fí'om-barafa'a Ísu Káráísitin-aai simátíma'maeta
nónaumne. Fí'owimo Ísu Káráísitin-aaimo
simátímaken-aempa'a ímba kométa karo séta
kesáá simátímaukumne séta kentáá súsa maimaé
iyónaumne.

¹⁷ Naaófá'á Maníkón-aai aúfáífimba
agaimaréna séna
miwítí kisausafesa ímba túwí'o mósá maráiyamba
Fasi'aénkóní kisausafesa
wenáwí'a mósá máráaro
agaimaréna siyáíye.

¹⁸ Waási kesáfesa kawé'-wáásí únemo sembá
Maníkón-aúranka'a ímba kawé'-wáásín-ofo
Fasi'aénkó kawé'-wáásín-owemo siwáí mindá
Maníkón-aúranka'a kawé'-wáásín-owe.

11

Karo'-áántá-wáásí táái.

¹ Kesúma maimaé iyé'a kári'-aaimo sendá ímba
aambá fáisinkaiya'a úwoi senó.

² Kembiwí
sáwí-amba arááíwáéfo sénamo Maníkó
káráwiyaintemba miyáumai kenká'á

káráwiyaumne. Kawe'-ínáá'árúmó moórá-waasionka'o símáráantemba miyáumai kembá tí'mae'a Ísu Káráísitimpa'a mátínkáana'a wesé'a ménaawe súne.

³ Naaófá'á iyaankafayaankó moórá-ininkon-awi'a Ífimba karo'á simánkowana minááisáféna érai'e siyáíye. Miyáumai tuwímbai kentí imáyáa sáwí'a uwátinkaiya'a Ísu Káráísitintafe'a fasi'ámai imáyáamo ombá ifátúwááfaiye sé'a mindásafe'a óraa'-imayaa úne.

⁴ Ááéma afora'á Ísu Káráísitin-aai kosimatimewana'a ísówana Maníkóní ámútanko kesé'a mérowasa tuwímbai kempá'á wésa Ísu Káráísitin-aigomba kaentaén-áái simátimesa Maníkóní ámútankontafesa karo'-áái simátímúwa'a aamoí é'a minámbá arááíwaenae siyáawe.

⁵ Minkwáásísáfé'a karo sé'a Maníkóní aantá-waasi pósa óraa'-waasin-owe sembánifo minkwáási kembá ímba íyáákaraawe.

⁶ Aaimó wésimatimunananamo sóiko umbaimó wétaimba mindá ímba óraa-tantaa'an-ifo Maníkón-aaigoni áwáuma kawe'-úmai ísaraunda mindá óraa-tantaa'an-iye. Sáwífa-kanaa érai'-aai seyaafá simátimewana'a ísaraawe.

⁷ Maníkón-aaimo simátimewanda méyámbá ímba maiyé'a simátímakaumne. Miyámó ówánda kentúwí'a maimaé iyé'a kesúwí'a sáwísankaamba uráumne. Miyámó uráundasafe'a kentáfé sáwí'a uráíye sumbánifo ímba sáwí'a uráumne.

⁸ Kempímbá Maníkóní kísaumo maéwánda

Maníkóní waási fí'lo-fi'on-daopakewi súwa'nai esa tuwímbai-tantaa'a símúwa'a kempímbá kísau maiyáumne. Miwí sésa ánaaemba kentáá simíníye ímba sunkákémbá úwoi miwí tuwímbai-tantaa'a símúwa'a kembiwífímbá kísau maiyáumne.

⁹ Kesé'o komaéwánda kesí óntamba tai'ówa'a súwa'nai oró ímba séwánda méraawanasa Máséndóniyaa-marafakemba tuwímbai Maníkóní waási tésa ímbo makáawanda-tantaa'a másúwa'nai uráawe. Minká'ó uráudantemba ánaaemba miyámó ondá umbai-tántáá'a tímúnafo sé'a súwa'nai oró ímba sénauumne.

¹⁰ Ísu Káráisitini érai'-aaimo simátimundawi úndantemba Maníkón-aai simátímakaundarakemba kembiwí Ákáyaa-marafaken-kwaasifinkemba óntamba ímba maiyáumne-aai símae iyónasa minááisáfésa karo'-ááín-iye ímba sénááwe.

¹¹ Miyámó únda sirumbá tímú ina wétimuno. Sirumbá é'lo tímúnda Maníkó wésuwanaiye.

¹² Maníkóní aantá-waasi owémó kemó sen-kwáásí miwí túma maimaé iyésa sésa Póromo Maníkóní kísau maénamo kempákémbó óntambo máíntemba miyásá úne sefó sé'a kempákémbá óntamba ímba maé'a miyá ónaumne.

¹³ Miwí mérowana Maníkó kesí aantá-waasin-owe ímba séna ti'mákaiye. Ísu Káráisitini kísau-waasisa úne karo'á sésa wení kísau máúmne wésewe.

¹⁴ Miyán-kísáúmó máémba ímba sáá'a wéiye. Waántáwanko wíyómpakemba Maníkóní kísau-waasigoni sáraamba wéiye.

15 Wení kísau-waasi wemó intembá ésa arupíse-waasiyaamba ésa waé'mai karo'á wésewe. Mindásafena ímba sáá'a wéifo kembiwí ímba táá'a íno. Miwítí sáwí-kisaurakemba sáwí-meyamba maénááwe.

Ísuni kísau mo maúndarakemba umbai-tántáá'á kempímbó tiyáin-aaí.

16 Maarán-áái aneka'ó súnda kentáfé'a sáwí-imayaawara'-waasi iyé-áái ímba seró. Énifo miyámó sé'o é'a ímba a'áo sé'a siyuwáíya'a kárika'a kesúma maimaé iyóno.

17 Kesúmo maimaé iyúnda Fasi'aénkó siyáintemba ímba é'a sáwí-imayaafinkeni'a úne.

18 Sáwífa'-waasi marapákén-tántáátáfésa imáyáa ésa miwí túma maimaé wéiyofó kewará'á kesú maimaé iyónaumne.

19 Kembiwí kesáfé'a karo sé'a kawe'-ímáyááwará'-wáásísá únemo semba sáwí-imayaawara'-waasisafe'a kanaán-íye sé'a aamoí wéowe.

20 Tuwímbai kesé'a komésa kentí imáyáa tafisewa'á sentembá owasá kentí óntamba karo'á simátinkesa wénesa kentúwí'a símai sáwí'a ésa sáwí-aaí simátinkesa miyámó ombá ímba a'áo semba kanaán-íye wésewe.

21 Sáwí'o uwátínkáántemba kesé'a kométa kesáá ímba kanaa'á miyásá uwátínkaraumpo sirunkó sáwí'a isa'á mináái sune.

Tuwímbai miwí túmo maimaé iyóntemba ímba sáá'a ína'a miyáumai kesú maimaé iyónaumne. Miyámó ondá sáwí-imayaawara'-waasiyaamba ónaumne.

22 Miwí túmo maimaé íyówi sésa Ípúru-aaifinkemba sune sewa'á kewará'á minááífinkémbó súndawi úne. Miwí sésa Ísarerin-andafaken-kwaasi úne sewa'á kewará'á minándáfákén-kwáásí úne. Miwí sésa Embaramun-aísaafitantambo uráundawi úne sewa'á kewará'á miyáumai wenaísaafitantambo uráundawi úne.

23 Miwí sésa Ísu Káráísitini kísau-waasi úne sewa'á kewará'á miyáumai Ísu Káráísitini kísau-waasi é'a miwí wéiyaakaumne. Miyán-ááímó súnda sáwí-imayaawarawiyaamba sune-imayaa é'a Ísu Káráísitini kísau wémaunda óraa-kísau wémae'a miwítí kísau wéiyaakaumne. Maníkón-aaimo simátimundarakemba ándáfa'o sínkáámba sáwífa'-i'an-ifo miwímó ándáfa'o tínkáámba ímba sáwífa'-an-íye. Sáwífa'-i'a sínkááwa'a púwóraantambo úndanifo úwoi súnaraumne. Miyán-tántáá'á kempá'á sáwífa'-i'a tiyáifo miwífá'á ímba sáwífa'-i'a tiyáíye.

24 Ísu Káráísitini kísau mo maúndarakemba Yúndaa-waasi séfataase-ika'a áwíyandasambo súwiyonku'-nomba sáwífa'-i'a 39-i'a súwiyonku'-naraawe.

25 Ísu Káráísitini kísau mo maúndarakemba Rómu-kamani-waasi kaumbo-íká'á kunánaantamba sínkankaawe. Moórá-kanaa kentáfesa puwínkwae sésa óntantamba sínkamuwa'a marapá'á tanaa-faráumne. Kaumbo-íká'á nompín-táómpimba nówánana mindómpín-táómba kúwáferombanifo kemá úwoi súnaraumne. Moórá-ika'a miyáumai nompín-táómba kúwáferowa'a mindómpimbá ayáátááka'a moórá-no'waane moórá-waawaiye mé'a ímbo

puwówánda úwoi méraumne.

26 Ísu Káráisitini kisaumo maúnda fi'o-fi'om-barafa'o núnda piri'-nónkó maé'máeraantamba isa'á aampa'á umén-kwáási sínkamoraantamba owa'á kesí waási Yúndaa-waasi sínkamoraantamba owa'á fi'onkaa-waasiwara'a miyá owa'á fi'o-fi'on-oraa'-naopimpa'a núnasa sínkamoraantamba owa'á aampa'á fi'on-daopare'o kúnda sínkamoraantamba owa'á óraa'-nompa'o táómpimbo núnda sínkamoraantamba owa'á tuwímbai kentáfésa karo'á sésa ení waási úne sésa sínkamoraantamba owa'á miyámó ombá úwoi súnaraumne.

27 Ísu Káráisitini kisaumo maúnda óraa-kisaumo maúnda suwesaraí isa'á minkísáú wémae'a sáwífa'-no'waamba ímba sún-kwaé'a Ísu Káráisitini kisaú wémae'a sáwífa'-i'a sááimo táimbá noné tón-iyaine mé'a sáwífa'-i'a táwí'a síyáísa'a sáwí-unankwatoi uré'a méraunana

28 ímba miyán-úmbái-tántáái'-aantembanifo fi'o-fi'on-daopa'a Fasi'aénkóní waásiya'o káráwiyaunda-umbai-tantaako kempá'á aasiyaasí wétiye.

29 Fasi'aénkóní waásifinkembo tuwímbai ímbo fasi'ámaimo arááiwaémbe sirumbá uwátinkaunana minúmbái-tántáákó kempá'á wétiye. Kawe'-ámbó arááiwaéwanamo moóráwigo tafisisasamó sáwí'o ombá sirumbá uwátinkaunana minúmbái-tántáákó kempá'á wétiye.

30 Ímba moórá-amba wéraifo kesúmo maimaé iyúnda tuwímbai-tantaa'a kempá'á tisasá

suwánésa sésa aamoisaén-kwáásín-iyé sen-ááímó simátíménda ísáaro.

³¹ Maníkó kentáásí Fasi'aénkó Ísu Káráisitin-afowan-awi'a mósá ma'maé iyónaumne. Simátimunda-aai ímba karo'-ááín-ifo Maníkó ísaraiye. Tuwímbai-tantaa'a kempá'á tisasá suwánésa sésa aamoisaén-kwáásín-iyé sen-ááímó simátíménda ísáaro.

³² Moórá-oraá'-nao'-awi'a Támásikasifa'a méraawanana káráwiyowin-awi'a Árétsi wení kísau-waasi óraa'-waasigo kentáféna simátiména séna áí'mae'a ándáfa'a móauwaaro súwasa mindáókoni sí'-óntará'á káráwiyowasa

³³ tuwímbai súwa'nai esa kunánáan-unampimba fáitumai sí'-afaapimba máapa'a túsúsinkesa ándára'a ta'ótokowa kuméme'a marará'á kumówánasa siyúwówa'a kóuraumne.

12

*Fasi'aénkó kaaínkáán-úmaimo aráásímakain-
aai.*

¹ Kesúmo maimaé iyúnda miyán-ááígó ímba kentáá súwa'nai ínifo kentáfé'a Maníkóni aantá-waasin-iyé síyantafe'a kempá'ó tiyáin-tantaakon-aaimo simátíménda ísáaro. Fasi'aénkó kaaínkáán-úmaimo aráásímakaimba simátíménda ísáaro.

² Ísu Káráisitini waási méraawanana Maníkó kusí'maena wíyómpa'a sanaan-úrambo iyúmba kesimankóná kunáíkai mótú'-waasiya kusíkaiyo ímba isáúmpo Maníkó aantemba ísaraiye. Miyámó uráunda 14 aatai maisukáumne.

³ Maníkó kusí'maena wení kawé'-mápá'ó iyúmba kesimankóná kunáíkai mótú'-waasiya

kusíkaiyo ímba isáúmpo Maníkó aantemba ísaraiye.

⁴ Kusí'maena wení kawe'-mápá'á mósinkowa'a mifá'-mé'a tuwímbai-tantaakon-aaí ísaraumpo simátíméndamo é'a sáwí'a ónaumpo ímba kanaa'á simátimenaumne.

⁵ Miyámó uráintafe'a kesú maimaé iyé'a kesí kísausafe'a ímba kesú maimaé iyé'a tuwímbai-tantaa'o kempá'ó tisasamó suwánésamo sésa aamoisaén-kwáásín-iyemo sen-ááísáfé'a kesú maimaé wéiyune.

⁶ Kesúmo maimaé iyónae sékaa érai'-aaisafe'a kesú maimaé iyúna'a kentáfé'a sáwí-imayaawara'-waasin-iyé ímba kanaa sewisinó. Énifo kesú ímba maimaé wéiyune. Aaimó súndarakembo kesúmo maimaé iyúndaraka mináái isésa tuwímbai kentáfésa sésa óraa'-waasin-iyé sewisinó. Mindá ímba siráái wétaiye. Kesí kísau awáné'a simátimunda-aaí isé pó'a méraundawini áwáuma suwánaawana siráái wétaimba mindásafe'a kesú ímba maimaé iyúne.

⁷ Maníkó siyówa'a fí'oran-kawe-tantaa'a sáwífa'a awánááwánana Maníkó kentáféna séna wenáú maimaé iyífo séna moórá-tantaa'a sí'o í-tántáá'á súfimba faimarówana mindásafena waántáwanko sáwí'a uwásínkáísana kesú ímbo maimaé iyóndasafena Maníkó miyá uwásínkaraiye.

⁸ Kaumbo-íká'á Fasi'aénkó Ísu Káráísitimpa'a inái sé'a maantántáá'á maisiyúwéna'a kawe'-úmai méraano séwánana

⁹ minkáúmbó-íká'á séna ímbanifo miyá uréna'a úwoi áwa'nai ondá embá kanaán-iyé. Ímbo

fasi'ámaimo méraanda kesí fasi'aémbá áménana mifási'áénkó embá iyáákaina méinnone símaena iyáiyé. Ísu Káráisitini fasi'aénkó kenká'á káráwiyaimba pó'a

ímbo fasi'ámaimo méraundasafe'a aamoí úne.

¹⁰ Ísu Káráisitintafe'a imáyáamo únda ímbo fasi'ámaimo méraundawe símaimo sáwí'o uwásínkááne sáwí-aaimo simásínkááne umbaitántáá'ó wéraine sáwí'o uwásínkááne miyántántáátáfé'a ímbo imáyáa únda aamoí é'a sé'a ímbo fasi'ámaimo méraunda Ísu Káráisiti fasi'aémbá símisa'a fasi'ámai méraumne sune.

Kórinti-naoraa-waasi imáyáa arupísemo uwátínkarain-aai.

¹¹ Miyán-ááímó simátimunda kesúraamba maimaé iyé'a sáwí-imayaawara'-waasiyaamba úne. Kembiwí karo'á sé'a Maníkóní aantá-waasin-owe sen-kwáásí miwí kembá ímba iyáákaraawe. Kemá úwoi-waasi úndanifo miwí kembá ímba iyáákaraawe. Póro Maníkóní aantá-waasi iyé-áái kembiwí karo'-ááímó sen-kwáásísáfé'a simátiméraamba ímba simátimakaafo kemá Maníkóní aantá-waasi úne-aai imáyáa iyantafe'a kempá'ó tiyáin-tantaakon-aai maanáúfáíimbá simátimune.

¹² Maníkóní aantá-waasiti kísau maarán-iyé.

Fí'oran-kawe-kisau ímbo awánaraan-kisau Maníkóní fasi'aéntámbá wémaewe. Kempímbá komé'a miyán-kísáú wémae'a ímba ifá tuwááwána'a suwánaraawe.

¹³ Nóra séra kentáfé sé'a Maníkóní waási fí'o-fi'on-daopaken-kwaasiya'a kawe'-úmai káráwiyenawa kentáárá'á ímba miyáumai wégarawiyo sembá fí'on-daopakewiya'o

karáwiyaundanten-úmai kembangiyá'á
 karáwiyaumne. Fí'o-fi'on-daopa'o Maníkóní
 waásifimbo komaéwánda miwí súwa'nai
 uráafo kempimbó komaéwánda súwa'nai oró-
 áái ímba séwándarakemba miyán-úmbái-áái
 ímba simátínkaraumne. Miyán-úmbái-ááímó
 simátínkaraundarakaa kawé'á ówána pó'a aamoí
 uwásínkaraawisino. Miyán-ímáyáámó ombá
 ifátúwáaro.

14 Kae'-í'a kentópa'a kuré'a káfé'a
 wétó'mayaan-e'a aneká kónae sé'a úmpo kondá
 umbai-tántáá'á ímba timé'a kentí óntambo
 simíyantafena ímba wésinkaifo kentirumbó
 simíyantafena wésinkaifo kónaumne. Iyámpói
 ímba tinófoiya'a káráwiyesa wétuwa'nai-ofo
 tinófoi iyámpóiya'o káráwiyesa túwa'nai ontembá
 kemá miyá wéumpo

15 túwa'nai ondasáfé'a makáunda-tantaa'o
 túwa'nai úmaimo taí'ásuwe'o óraa-kisau maé'o
 miyámó ondafimbó púwóndasafe'a aamoí úne.
 Kesirumbá óraa'a wétimumpo kentirumbá kári'o
 wésimemba mindáwara'a taí'ááfainifo imáyáa
 úmai kawé'án-oro.

16 Súwa'nai oro ímba séwándarakemba umbai-
 tántáá'á ímba tímakaunda-aaisafe'a érai'-aain-
 iye seró. Kempinkémbá tuwímbai kentáfésa
 karo'á sésa kentáásí óntamba maénae séna karo'á
 simásínkaraiye wésewe.

17 Nóra séra miyá uráumno. Ti'mákaundawiya
 kentí óntamba maimaésawa kembá másímakaaa.

18 Táításimba fasi'aén-áái simáme'a
 ai'mákaunda moóráwigo Ísu Káráisitini
 waásiwara'a ti'mákaundarai mindáraiya karo'á

símai óntamba maimaé másímakaayo. Táítási ímba miyá-sáwí'á uráiyé-aai ísaraawe. Wesékai mimbórá-ímáyááfínkémbá kísau wémauye.

¹⁹ Kesí waásisono. Maanáúfáímó torausiyamba maarán-káró'-ímáyáá é'a kentáá súranka'a Póro wenáái arupíse ónae séna maanáúfái agaiyáiyé sénááwe-imayaa úne. Ímba miyán-ááísáfé'a agaé'a Ísu Káraísitiye'a kááísamai mé'a Maníkón-aúranka'a kentí imáyáa túwa'nai ónae'a miyán-áái wésimatimune.

²⁰ Kentópa'o kondamó ímbo kawé'-úmaimo méwa'o kotuwáné'o ímbo aamoimó ondasáfé'a óraa'-imayaa úne. Kentópa'o kondamó óraa'-aaimo simátíméndamo isé'a ímba aamoí iyantafe'a óraa'-imayaa úne. Kentópa'o kondá aaisambá sé'a kaoré'a aaisambá sé'a tuwínkaa'-é'a símai sáwí'a uwátinke'a tiyo-aai sé'a kentúma maimaé iyé'a fí'o-fi'on-aai sé'a miyá-sáwí'á íya'a kotuwánáúnafo sé'a mináái simátimune.

²¹ Kentópa'o kondá aare-úméné waai-úméné mó on-ímáyáá ímba tínaaemba uwámake'a sáwí-imayaasafe'a tirááísafe'o owímbá ímba tínaaemba uwámakenka'a kotuwánáúnafo sé'a mináái simátimune. Kentópa'o kondá miyá-sáwí'ó íya'o é'a Maníkón-aúranka'a kembiwísáfé'a sigaesáfé'a onaná sirunkó umbái táíniye.

13

*Ísun-aaisafe'a
káráwiyon-aai.*

timankúnkúmbo

ombá

1 Kae'-í'a kentópa'a kuráundanifo aneka'á kónaumne. Kaumbo-kae'-wáásímó mimbórá-ánká'ó síyan-aaimo éta minááígómbá arupísesa ónaumne.

2 Ímba aifa-kánáán-ifo ánaaenka'a kentópa'o komaéwánda sáwí'o uráawiye seyaafá'é fasi'aén-áái simátímakaumne. Káfé'a némpa'o méraunda mináái simátíme'a sune. Kentópa'o kondá sáwí'o uráantafe'a kowésimatime'a ímbo étínkáanda sáwí-meyamba tíménaumne sune.

3 Kentáfé sé'a Ísu Káráisiti simámísanawa wési wení imáyáafinkena wésiyo wésewe. Kentópa'o kondá sáwí-meyambo tíméndara'a suwáne sé'a Ísu Káráisitimo simámíntemba simásímiye sénááwe. Wemá Káráisiti kentirumpimbá kísau wémaena ímba aamoisaéwí éna wení fasi'aéntámbá kísau wémaiye.

4 Ááéma wemá fasi'aémbá tuwéna aamoisaén-kwáásiyáámbá úwasa aaraa-táiyá'á tufúwana Maníkó iyáfasinankowana Maníkóní fasi'aénká'á méraiye. Miyáumai kesááwará'á aamoisaén-kwáási úndanifo Ísu Káráisitiyeta kááíseta Maníkóní fasi'aénká'á méta kembiwí wétuwa'nai-une.

5 Kembiwí Ísu Káráisitin-aaisafe'a timankúnkúna wéeo ína wéeo imáyáan-oro. Ísu Káráisiti kentirumpimbá mérai ína méraiyo imáyáan-oro. Méraino'é é'a Ísu Káráisitini waásisa úne sé'a

6 kentáásáfé'a Maníkón-aai simásíméwin-owe sénááwe-imayaa wéune.

7 Kentáásáfé sé'a Maníkón-aai simásíméwin-

owe síyantafeta ímba inaisá sumpo kembiwí kawe'ó íyantafeta Maníkómpá'á inaimó súndasa Maníkóo túwa'nai inasá kawe'an-oro sune. Ímba sáwí'a iyamba póta ímba sáwí-meyamba mátimenasasa tuwímbai kentáásáfesa sésa ímba Maníkón-aai simásíméwin-owe síyamba mindá ímba óraa-tantaa'an-ifo kembiwí kawe'-úmaimo méraiyanba mindá óraa-tantaa'an-iye.

⁸ Érai'-aaigo iyáákaino séta kisausa maéta wétuwa'nai-une.

⁹ Kentópa'o kondasá Maníkóntáfé'o fasi'amaimo méraiyanbo éta aamoisá ónaumne. Miyámó iyambo éta ímba sáwí-meyamba timéta aamoisaén-kwáásiyáámbá éta mindásafetaawara'a aamoí ónaumne. Sáwí'o ompínkémbá kawe'ó íyantafeta Maníkómpá'á inaisá sune.

¹⁰ Kentópa'o kondá sáwí'o ontáfé'a fasi'aén-áái kosimátimunafo sé'a némpa'a mé'a maanáúfái agai-timúne. Ímba sáwí'a uwátinke'a kenti imáyáa fasi'átínkáándasafena Fasi'aénkó iyáfasisinkowa'a kenká'á káráwiye'a némpa'a mé'a maanáúfái agai-timúmpo torausé'a súndantemba oro.

¹¹ Kesí waásisono. Kawe'-úmai mé'a kawe'-ámbá arááiwa'e'a súndantemba é'a mimbórá-imáyáa úmai mé'a faru úmai méraaro. Miyámó íyanamo éna Maníkó arumbá tiména farumó uwátínkáíwai kembiwísé'a méiniye.

¹² Maníkóní akúní'o ontáfé'a moórá-mora tiyáámba tíméro.

13 Maníkóní waási maanká'ó méraawi kembiwísáfésa kawé'-úmai méraaro wésewe.

14 Fasi'aénkó Ísu Káráísiti úwoi túwá'nai isaná Maníkó arumbá tímísana wení Ufaen-ámútánkó kembiwísé'a méraisa'a mimbórái'a úmai méraantafe'a inai sune.

Kemá Póro sún-da-aaí tai'áiye.

Aú-aaí símai kááísamakain-aaí
The New Testament in the Awiyaana language of
Papua New Guinea
Nupela Testamen long tokples Awiyaana

copyright © 1984 Wycliffe Bible Translators, Inc.

Language: Awiyaana

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-17

PDF generated using Haiola and XeLaTeX on 18 Mar 2025 from source files dated 31 Aug 2023

0dda5aa4-c019-59cf-b9ee-e1fd4762d49c